

*Commentaires*  
*Surah Al Kahf*

*Lajna Ima'illah Ile Maurice*



# *Sommaire*

*3*

*Date et place de révélation*

*5*

*Une bref récit de Surah Al Nahl et Bani Israil*

*11*

*Banne habitants de la cave*

*17*

*L'exemple des 2 hommes*

*21*

*Isra de Moïse (as)*

*23*

*Dhul Qarnain*

## *Date et place de révélation*

D'après Ibn Abbas et Ibn Zubair (ra), le surah entier ti révélé à Mecca et la plupart de banne commentataires du Saint Coran d'accord lor sa point la. Le rapport d'Abdullah bin Massud (ra) montré ki sa surah la ti révélé début de la période mecquoise. Li dire ki Bani Israil, Kahf et Maryam zot parmi banne surahs ki ti révélé très tôt durant la mission du Saint Prophète (saw). D'après certain autorités, Surah Al Kahf pas finne être révéler étape par étape mais finne révéler entièrement ène sel coup.

**Anas (ra) rapporter ki ti éna 70,000 anges ki ti protège sa surah la.**

(Manthur vol. 4 p. 210)

Sa hadith la pas veut dire ki certain chapitre du Saint Coran ti plis protégé ki banne lézot chapitres quand zot ti révéler. Banne hadith ki dire ki autant anges ine désanne pou protèz tel et tel surah pa pé faire référence a zot protection au moment de la révélation mais après zot révélation. Chaque chapitre du Saint Coran traite ène sujet particulier. Des fois ène chapitre contenir banne prophéties et la véracité du Saint Coran dépanne lor l'accomplissement de sa banne prophéties la. Par conséquent, banne anges, ki control et supervise la direction de banne zafer dans le monde, zot éna la responsabilité pou crée banne conditions et prend banne tel mesures ki nécessaire pou l'accomplissement de sa banne prophéties la. En bref, la protection de banne surahs par banne anges pas veut dire protection de banne surahs à l'heure ki sa banne surahs la pé être révéler à ène prophète. Vrai travail de protection commencer après la révélation de banne surahs et continuer jusqu'à l'accomplissement de banne prophéties ki finne mentionner dans sa banne surahs la.

Surah Al Kahf contenir banne prophéties concernant destruction de banne nations aussi puissante ki Gog et Magog et à propos la correction de la fausse propagande chrétienne contre l'Islam. Des milliers de banne anges pé travail pou l'accomplissement de sa banne prophéties divine la depuis le jour ki sa surah la ti révéler.

Alors ki chaque chapitre du Saint Coran zot assez complet et ki chaque chapitre indépendant de banne lézot chapitre concernant banne différent sujet ki zot traiter, mais éna ène lien bien profond ki connecté tous banne différents chapitres du Saint Coran. Alors, pou nous comprend profondeur de banne versets révéler dans Surah Al Kahf, li bien important ki nous lire banne surahs ki trouve avant Surah Al Kahf, c'est à dire Surah Al Nahl et Surah Bani Israil.

# *Ène bref récit de Surah Al Nahl et Bani Israil*

A la base, le thème de Surah Al Nahl (l'abeille) constitue le fait ki l'univers en entier dépanne lor la révélation pou ki li fonctionne couma bizin, ki li manifesté ou caché, directe ou indirecte. Finne introduire Jihad dans sa chapitre la couma ène sujet bien important. Le fait ki Jihad ti pou vine la cible de tout banne attaques de tous parts, finne laisse entendre ki pareil couma du miel, ki protégé de toute attaque par la piqure de banne abeilles, le Saint Coran, ki ène entrepôt du miel spirituel, bizin être protéger par la force ki banne musulmans bizin employer couma self-defense. Finne avertir banne ki pas croire ki Allâh finne décrète banne grand changement ki le Saint Coran pou améner, pou éna lieu bientôt. Le temps pé exize ène changement et sa nouveau message la possède tou banne éléments et ingrédients essentiels pou ène enseignement parfait. Banne suivants de sa nouveau enseignement la pou conne le succès et tous pouvoir et domination pou vine dans zot lamain. Pou éna ène vrai la guerre contre banne mécréants et zot dirigeants pou détruit. Vers la fin du surah, Allâh pé dire le Saint Prophète (saw) ki la sphère et la portée de so prédication pou élargi et pou englobe banne chrétiens et banne juifs dans so orbite. Sa pou amène a ène nouveau opposition et banne musulmans pou subir persécution de tous parts, mais la cause divine de l'Islam pou continuer grandi et prospérer malgré l'opposition et persécution et banne ennemis pou gagne ène fin terrible.

Par conséquent, Surah Al Nahl ti promette puissance et domination à banne musulmans. Ti dire zot ki zot pou contrôle banne vaste empires mais ki quand zot gagne gloire et prospérité, zot pas bizin comporte zot couma banne juifs, ki ti gagne banne bénédictions similaires mais zot finne mal servi sa banne bénédictions la et zot finne attire la colère

de Dieu lor zot-même et zot finne gagne la destruction. Finne dire ki banne musulmans pou subir banne persécution sévère des 'Gens du livre' mais ki zot bizin subir sa avec patience et courage jusqu'a ki Bondieu accorde zot la victoire complète lor zot banne opposants.

Ena ène zoli connection entre banne dernier versets de Surah Al Nahl (ki finne decrire brièvement la haut) et banne premier versets de Surah Bani Israil. Dans Surah Bani Israil, finne attire l'attention lor le fait ki l'opposition dépi ban 'Gens du livre' pou commencer à Madina et pou amène à ène défaite totale et les 'Gens du livre' pou déconcerté et zot places sacrés pou vine pou banne musulmans. Sa surah la, couma so nom mem indiquer, traite l'histoire de banne juifs et faire référence à deux occasions ki finne marque l'histoire quand zot ti désobéir ouvertement et zot ti rejette deux grands prophètes de Dieu - David et Jésus (as). Sa rejet la finne faire zot souffert de la destruction de zot pays, d'abord aux mains de Nebucadnetsar (ou Nabuchodonosor), le Babylonien, ensuite aux mains de l'empereur Romain Titus. Sa double destruction de banne juifs la ti en faite ène avertissement pou banne musulmans ki zot banne mauvais actions et transgression pou amène également a ène double éclipse de zot la vie ! La montée et le déclin de banne juifs implique ène avertissement ki Bondieu pou faire faveur lor banne musulmans et pareil couma banne juifs, zot aussi zot pou gagne grandeurs et gloire matérielles mais, quand zot pou gagne la richesse, pouvoir et influence, zot bizin pas blier Bondieu. Sa avertissement la, cependant, li accompagné d'ène mot d'espoir et réjouissance pou banne musulmans. Nous, banne musulmans, étant de la dispensation de sa Prophète ki finne vine avec la loi finale, nous pas pou souffert l'extinction couma banne juifs. Nous pou sorti triomphant après banne revers initial.

Bondieu finne décrète ène grand but pou le Saint Prophète (saw) et ène destin puissant finne reserver pou li. So nom pou résonne dans banne coins les plus retirés de la terre et li pou honoré jusqu'à la fin des temps. Le monde pou reconnaite li couma le plus grand guide et chef de l'hu-

manité et le Saint Coran comme ène source spirituel illimité. Banne dernier versets de sa surah la décrire brièvement banne signes des derniers jours et de banne mauvais kitsoz ki pou reigné dans le monde et dire ki c'est la prière et connection avec Dieu seulement ki pou capave sauve ène dimoune du péché. Et le dernier verset de sa surah la coze lor Isra (voyage spirituel nocturne) du Saint Prophète (saw). Sa vision la ti ène prophétie à propos le grand avenir ki l'islam pou éna – couma l'émigration du Saint Prophète (saw) à Madina finne servi pou établir le glorieux avenir de l'islam ki à l'époque ti encore caché aux yeux de tous dimoune. Sa victoire glorieux de l'islam la ti pou détruire complètement banne fausses doctrines de la trinité et pluralité de la divinité. La défaite complète de sa banne fausses doctrines la, ki ti prophétisé par ène inconnu, ène pauvre dimoune de Mecca ki pas ti éna auken moyen et pouvoir, à ène l'époque cotte pas ti éna auken indication apparent ki sa prophétie la pou accompli, li montrer ki Sa Bondieu ki finne faire sa prophétie la à travers So Prophète Li Même sa vrai Bondieu ki péna ni garçon ni auken partenaire.

Maintenant nous capave introduire Surah Al Kahf. Sa surah la commencer avec ène avertissement ki destruction pou tombe lor banne ki associer ène garçon avec Bondieu, en connection avec dernier verset de Surah Bani Israil ki finne décrire brièvement la haut. Sa banne ki associer ène garçon avec Bondieu, finne dénonce zot couma banne ignorants et zot finne privé de tou banne vrais connaissance comparer à banne dimoune ki possède la connaissance et ki prier et glorifier Bondieu et éna la confiance ferme lor So banne promesses. Le Saint Prophète (saw) finne gagne l'orde ici, pou avertir banne ki orgueilleux à cause de zot pouvoir, richesse et moyens et ki penser ki sa banne kitsoz la zot éternel et ki zot finne immunisé contre punition divine la et ki éna ène condamnation sévère et ène chatiment pou banne ki associer ène garçon avec Bondieu.

## **Finne rapporté ki Le Saint Prophète (saw) finne dire ki celui ki lire 10 premier versets et 10 dernier versets de Surah Al Kahf, pou reste protéger contre l'influence du Dajjal ou l'Antéchrist.**

Ceki le Saint Prophète (saw) ti pé rode dire par Dajjal, c'est sa peuple chrétien corrompu de nos jours la. Premiers 10 versets de Surah Al Kahf coze lor banne ki "associer ène garçon avec Bondieu" et péna personne ki faire sa apart banne chrétiens d'aujourd'hui. 10 derniers versets coze lor banne dimoune ki finne dévoué tout zot létemps, énergie et zéffort pou gagne banne richesses matérielles et banne ki finne tellement perdi dans zot banne inventions et découvertes mécaniques ki zot penser ki zot capave perce le secret de la création. Sa description la applique aussi pou banne nations chrétiennes de l'Ouest. Donc, sa surah la éna ène sorte de commentaire concernant banne l'idées, croyance, ambitions et actions de sa banne pays la.

Le Saint Coran finne gagne le nom de Qayyim (gardien) dans banne premiers versets de sa surah la.

Le Saint Coran li :

(1) ène gardien de banne écritures précédentes dans la mesure où li corrige et supprime banne erreurs ki finne rentrer.

(2) Li aussi ène gardien pou banne future génération parceki li prend en charge zot éducation spirituelle et li guide zot lor chemin ki amène à la réalisation de l'objectif de zot la vie.

Nous bizin noter en particulier ki le Saint Coran li d'abord 'donne avertissement' ensuite 'donne bonne nouvelle' et à nouveau comme 'donne avertissement'. Banne ki pas croire finne gagne double avertissement et entre sa deux avertissement la, banne croyants finne gagne banne

bonne nouvelle. L'ordre dans lequel finne mentionne sa, li pas ène hazard - éna ène raison derrière sa. Sa deux avertissement la et sa ène bon nouvelle la faire référence à sa 3 périodes important de l'histoire de l'Islam et li englobe 3 prophéties.

Le premier avertissement concerne banne mécréants de la Mecque et tous sa banne dimoune à l'époque du Saint Prophète (saw) ki ti rejette so message et zot finne gagne punition pou zot rejet et opposition. Banne 'bonne nouvelle' concerne banne musulmans ki après ki zot ennemis finne détruire, zot finne profite de banne faveurs divine pendant ène long létemps.

Le second avertissement implique ène prophétie ki après ki banne musulmans finne profite pouvoir et domination, zot pou perdi zot gloire et banne nations chrétiennes pou réprend zot place et zot pou répanne dans le monde entier et pou vine ène obstacle pou l'expansion de l'Islam. L'avertissement concerne banne chrétiens des derniers jours, c'est à dire, banne chrétiens de nos jours, ki finne gagne avertissement d'ène punition sévère ki pé attane zot.

Banne signes de sa punition divine la pé déjà trop manifesté pou nous ignore zot. Bondieu finne béni banne nations chrétiennes de l'Ouest avec banne conforts et richesse matériels et finne donne zot pouvoir, prestige et domination mais zot finne faire ène erreur grave quand zot finne prend ène humain fragile comme le fils de Dieu. Le Saint Prophète (saw) so inquiétude et chagrin ki li ti éna pou sa banne dimoune la finne presque tué li. Mais l'être humain so ingratitude li tel ki alor ki le Prophète ti pe ressenti autant de chagrin pou sa banne dimoune la, li pas finne recevoir nanier apart banne injures, moqueries et invective de la part de sa banne mem dimoune la !

Dans verset 8, Allāh dire :

**« [...] Nous finne faire tout ça ki lor la terre couma ène or-**

## **nement pou ça *la terre-là* [...] »**

Sa montrer ène grand lesson morale ki nanier lor sa la terre la pas finne crée pou nanier. Tout ceki Allāh finne crée li ajoute à la beauté de la vie humaine. Tout les temps éna ti attane de banne musulmans ki zot rapel sa vérité la et zot dévoué zot letemps et l'énergie pou explore banne grand secret de la nature et explore banne propriétés illimités de so banne éléments. Mais zot finne ignore sa lesson suprême la - par contre banne chrétiens de l'Ouest finne rapel sa bien et zordi zot mem ki la nation ki plus avancer et puissant dans le monde. Cependant, li bien chagrinant ki au moment ki banne nations de l'Ouest finne profite grandement de sa lesson la dans banne paroles comme suite ; « Nous finne faire tout ça ki lor la terre couma ène ornement pou ça *la terre-là* », zot finne ignore la second partie de sa verset la ki dire :

**« [...] pou ki Nous testé banne-là et guetté ki sanne-là d'ente banne-là ki meillère dans zot conduite. »**

Péna auken doute ki zot finne faire la science avancer mais l'objet de sa progrès la et l'expansion de la connaissance de l'homme c'est ki, la conduite de l'homme capave vine pure et la vie humaine capave vine plus paisible. Mais sa banne nations la, au lieu ki zot servi zot connaissance et ressources pou servi l'homme finne faire la vie de l'homme vine plus misérable et invivable avec la tyrannie, corruption et l'injustice ki pé reigner partout dans le monde. Tous ceki dans sa le monde la zot transitoires et finne crée pou atteindre banne buts plus élevés et sublimes-ki pou servi l'humanité. Le fait ki banne découvertes de l'Ouest pas finne accomplir le but pou faire la vie humaine vine plus paisible et plus zoli, tou travail ki zot finne faire pou fini par détruire couma finne mentionné dans verset 9 :

**« Et en vérité, Nous pou faire tout ça ki lor là *vinne* ène sol aride. »**

## *Banne habitants de la cave*

Banne habitants de la cave c'est banne chrétiens du début ki finne subir banne persécutions innomable à cause de zot religion et lor ki, Allāh finne avoye banne bénédiction matériels et spirituels et banne faveurs comme récompense pou zot banne sacrifices. Éna plusieurs narrations quant à ki banne habitants de la cave ti été, kotsa zot ti pé habiter et dans ki conditions et circonstances zot ti pé vive. Ibn Ishaq, ki ène de banne historiens musulmans ki plus éminent, finne donne nous ène l'idée de seki finne passé. Li dire ki quand l'idolatrie finne débuté parmi banne chrétiens, banne ki ti pé strictement adore ène sel Bondieu, étant vraiment affligé par la condition de zot coreligionnaires, zot finne renonce reste en zot compagnie. Sa finne arriver à l'époque de l'empereur romain Decius ki ti ène grand persécuteur de banne chrétiens. Certains de banne jeune chrétiens ki ti pé refuse pou adore banne idoles ti pé être arrêté et ti pé amène zot devant l'empereur. Li ti pé demande zot pou réfléchi et révise zot l'attitude et li, li finne ale en voyage. Au lieu ki zot obéir l'ordre de l'empereur, zot finne sauver et finne prend refuge dans ène cave. Quand li finne retourne de so voyage, l'empereur finne ordonne pou amène sa banne jeune hommes la devant li encore ène fois. Banne jeune hommes la ti pé peur ki banne la pou trouve zot et pou tué zot. Donc, zot finne prié pendant longtemps et avec beaucoup ferveur dans cave la et zot pas ti encore fini zot la prière quand zot finne tombe dans ène sommeil profond. Zot banne zafer ti à coté zot et zot lichien ti p surveille l'entrée de cave la. Banne poursuivants la ti vine rode zot cot l'entrée de la cave la mais personne pas finne éna le courage pou rentre dans cave la. Zotte finne consulté l'empereur pou monte ène muraille et zot finne ferme l'entrée de la cave. Éna différent versions de l'histoire 'banne habitants de la cave' et pas tous ki fausse mais possède ène signification profond et éna ène grand limportance.

C'est ène fait historique bien connu ki banne premiers chrétiens ti pé subir banne persécutions de la part de banne l'empereur romain idolâtres à cause de zot croyance dans l'unicité de Dieu. Sa banne dimounes inoffensif la ti puni de mort, d'exile et d'emprisonnement. Mais à l'époque de Decius, persécution ti plis sévère comparer à avant. Li ti envi rétablir l'ancien religion de Rome et avec sa l'objectif la en vue, li finne commence ène extermination systématique de banne chrétiens. Pou sauve zot mem de sa persécution cruel et inhumain la, banne chrétiens impuissants finne bizin trouve refuge dans banne cachette et l'étude de banne catacombes à Rome, montré ki apparemment sa ti banne havres de sécurité pou zot.

Sa banne catacombes la ki finne mentionné dans le Saint Coran couma 'cave' ti admirablement adapté aux besoin de banne chrétiens ki ti bizin reste casiette pendant banne longue période de temps. Apparemment banne chrétiens ki ti refugier zot dans banne catacombes ti pé garde banne lichiens à l'entrée pou ki zotte aboiment avertir zotte de l'approche banne étrangers. Pendant ène nombre d'années, banne dimounes la ti reste totalement couper du monde extérieur et zot pas ti conne nanier séki ti pé passer à l'extérieur. Ti éna beaucoup inscriptions dans banne catacombes la et apparemment banne premiers chrétiens ti strictement monothéistes. Péna auken mot ki ti indiquer ki zot prend Jesus (as) couma Bondieu ou le fils de Dieu - zot ti considère Jesus (as) couma ène berger ou ène prophète de Dieu et so mama, Marie(as), couma ène femme pieuse. Ti éna plusieurs mention de la tribu de Nuh (as) et Yunus (as) dans zot inscriptions. Sa montrer clairement ki banne premiers chrétiens ti considère l'Ancien Testament avec plus grand respect ki banne chrétiens de nos jours. Dans verset 17 de Surah Al Kahf montrer ki banne jeunes hommes monothéistes, pas ti banne individus dispersés mais zot ti faire partie d'ène communauté organisé et discipliné et banne membres de sa communauté la souvent ti pé réunir en privé.

Parmi tout banne récits, les faits suivants démontrer sans équivoque ki

banne premiers chrétiens ti croire dans l'unicité de Dieu et ki zot finne subir beaucoup persécutions à cause de zot croyance.

**Brièvement, le récit de banne habitants de la cave la représente l'histoire de banne premiers chrétiens et montrer couma zot finne mène ène campagne vigoureux contre l'idolâtrie et la croyance polythéiste et ki zot finne subir beaucoup de persécutions à cause de zot croyance dans l'unicité de Dieu.**

Dans verset 18 de sa surah la, finne décrire la position de la cave. Li paret ki, banne dimounes à qui pé faire référence dans sa verset la ti pé vive dans banne régions très haut dans le nord. Quand Bondieu finne désigne position de sa cave la, Li ti éna l'intention pou avertir banne musulmans ki zot ti éna ène ennemi dans banne régions du nord, conte qui, zot bizin reste particulièrement lor zot gardes. Banne nations chrétiennes à l'époque du Saint Prophète (saw) ti pé vive dans banne régions du nord et zot ti dans sommeil mais Allāh ti averti banne musulmans ki bientôt banne la pou léver de zot sommeil profond dépi des siècles et ki zot pou répanne dans le monde entier et zot pou controle le monde. Avant ki sa arriver, banne musulmans bizin fini prépare zot contre zot attaque dévastatrice. Banne musulmans finne ignore sa avertissement la. Zot finne prend sa avertissement la à la légère et zot finne vine banne victimes de banne machinations de zot banne ennemis.

**Au lieu ki zot reste unis, zot finne la guerre entre zot même et finne facilite travail de banne ennemis.**

Après khilafat de Hazrat Uthman (ra), ti éna beaucoup désascord entre zot et zot ti vine insouciant de banne dangers ki ti exister sous la forme de l'empire byzantine. Si banne musulmans ti réagir et ti conquérir l'empire byzantine, ki ti pou justifié parceki banne byzantins ki

ti attaque en premier, map le monde politique ti pou assez différent de ceki li été zordi. Complots de banne Abassides de Baghdad (musulmans) et l'empire byzantine de Constantinople d'ène coté et complots de banne Maures (musulmans) en Espagne et au vatican de l'autre coté, finne amène au déclin et à la destruction ultime de banne musulmans. Solidarité ki ti éna en Islam finne subir banne coups fatals à cause de banne désaccord internes.

A sa moment la, ène grand réveil politique ti prend place parmi banne nations chrétiennes de banne régions du nord. Si dans zot jours de pouvoir et de gloire banne Abbassides et banne Maures ti réunis pou ène cause commune pou soumettre et écrase banne nations chrétiennes, l'Islam ti pou répanne dans sa banne régions la et l'humanité ti pou épargné de beaucoup misères et massacres. Le pouvoir politique de banne chrétiens ti fini prédire dans le Saint Coran des centaines d'années auparavant et c'est la preuve ki le Saint Coran c'est ène source divine.

Sa l'époque la banne chrétiens ti dans ène l'état de dormance, personne pas ti pou imaginé ki zotte pou élève zot a ène tel puissance et gloire zordi.

Banne musulmans d'aujourd'hui finne gagne avertissement dans sa surah la pou pas essaye combatte banne nations chrétiennes puissantes avec banne moyen matériels parceki zot possède banne tels moyen militaire et matériels ki trop fort pou nimporte ki individu ou ène rassemblement de banne dimoune pou combatte avec zot avec succès. Banne musulmans pou senti zot impuissant devant la puissance irrésistible de banne chrétiens mais à auken moment zot pas bizin ale combatte avec banne moyen matériel. Au contraire, zot bizin éna confiance ferme lor banne promesses d'Allāh ki jamais Allāh pas pou laisse l'Islam tomber et ki c'est Allāh meme ki pou crée banne situations ki pou amène à la chute et destruction complètes de sa banne pays la. Dans verset 26 de Surah Al Kahf, finne faire référence au nom-

bre d'années ki banne premiers chrétiens finne subir persécution. Sa verset la, en passant, pé indique banne musulmans ki, pareil couma banne 'habitants de la cave' ti victimes et ki à l'avenir, zot aussi capave être victimes de banne persécutions pareil. Zot bizin subir sa banne épreuves et sa banne tribulations la avec patience et courage afin ki zot hérite banne faveurs divine.

Sa banne versets ki finne mentionné la haut la indique clairement ki banne récits ki finne cités à propos de banne habitant de la cave zot pas simplement banne zistoire intéressant mais zot faire référence à banne évènement spirituel ki finne éna lieu dans le passé et ki éna ène grand l'importance et en même temps, zot contenir ène avertissement pou banne musulmans pou ki zot reste toujours prêt pou faire face à banne épreuves pareil couma banne habitants de la cave finne subir.

**En fait, ène hadith rapporté ki le Saint Prophète (saw) finne dire ki banne habitants de la cave c'est banne compagnons du Mahdi. Banne récits de banne habitants de la cave contenir banne prophéties puissantes.**

Verset 29 de sa surah la amène ène support supplémentaire au fait ki banne récits précédents contenir banne prophéties important. En effet, ici pé dire nous ki à l'heure de la prédominance et l'ascendance de banne nations chrétiennes, pou éna ène peuple dans sa le monde la ki pou représente le vrai Islam et ki pou engager la nuit, le jour dans la prière et ki pou adore Bondieu. A l'époque de l'Imam Mahdi, banne soi-disant musulmans pou place zot lespoir concernant la gloire politique et grandeur de l'Islam lor l'emploi de banne moyens matériels et zot pou méprise banne suivants pauvre et politiquement sans auken importance de l'Imam Mahdi parceki zot concentrer lor la prière et l'adoration de Dieu. Sa verset la averti banne musulmans ki le succès de l'Islam pou dépanne seulement lor la prière et l'adoration divine.

Verset 29 de Surah Al Kahf mentionne 3 causes principales de banne malheurs et misères de banne musulmans à sa l'époque la :

- (1) Zot pou néglige la prière et l'adoration divine.
- (2) L'amour pou sa le monde la pou vine zot grand passion.
- (3) Zot pou perdi complètement dans poursuite de banne confort matériels et ène la vie de luxe.

Mais zot pou gagne délivrance avec ène changement complète de zot regard et plan de vie. Quand l'Imam Mahdi pou vini, pou népli èna Jihad avec l'épée mais plutôt pou éna ène enseignement paisible de l'Islam. Bondieu pou détruire la puissance irresistible de banne nations chrétiennes occidentales et la punition divine pou rattrape zot. Pou éna banne la guerre ki pas pou prend fin ziska ki zot pouvoir réduire en cendres et la poussière. Zot pou plorer pou gagne la paix mais zot pas pou gagne nanier – la vie pou vine l'enfer pou zot. Tous zéfforts ki zot pou faire pou amène la paix pou vine futile et banne tipti contributions de banne compagnons de l'Imam Mahdi, ki paret insignifiant mais ki honnête, sa pou couronné de succès.

Sa bref récit ki finne mentionné la haut la concernant banne habitants de la cave ou banne premiers chrétiens, c'est pou souligne le fait ki banne juifs ti attire colère Bondieu à cause zot ti pé rejette la vérité sans cesse, Bondieu finne choisir sa banne premiers chrétiens la pou accorde so banne faveurs. Mais quand après banne chrétiens finne éloigner du chemin de la vertu et ki zot finne prend banne directions et banne pratiques injustes, alors zot aussi, zot finne perdi sa banne faveurs divine la.

A present, nou pou aborde sa sujet la dans sa parabole des 'deux jardins' ki représente deux périodes de banne peuple chrétien. Premier, banne ki ti avant l'époque du Saint Prophète (saw) et le second c'est ban ki pendant nou l'époque mem.

# L'exemple des 2 hommes

A partir verset 33 dans Surah Al Kahf, ki commence dans forme d'ène leçon morale (l'exemple des deux hommes), ène description couma condition de banne nations musulmanes et chrétiennes pou été dans banne derniers jours respectivement. Sa dialogue ki éna entre sa deux hommes la représente le déclin et dégradation de banne musulmans à zot point le plus bas et la puissance et prospérité de banne chrétiens de l'Ouest ki pou au sommet dans banne derniers jours.

## Verset 33 :

**« Et donne banne-là l'exemple dé zommes. Nous ti faire pou ène dans ça dé-la dé zardins pieds raisins, et Nous ti entoure ça dé zardins-là avec pieds tammes, et ente lé dé, Nous ti mette banne plantations. »**

## Verset 34 :

**« Sakène dans ça dé zardins-là ti pé rapporte so fruits *en abondance* sans zamais manqué. Ente ça dé-la Nous finne faire coule ène la rivière. »**

## Verset 35 :

**« Et li ti éna banne fruits *en abondance*. Et li ti dire so compagnon avec ki li ti pé conversé : 'Mo pli rice ki toi dans di biens et pli fort grâce à mo clan'. »**

## Significations de banne mots dans langage de banne rêves :

Zardin : madame, zenfants, richesses, la vie rempli avec bonheur.

Raisins : provisions en abondance.

Pieds tammes : l'autorité lor ène grand nombre de personnes.

Maïs : expansion de banne domaines.

Rivière : ène zomme éminent.

Fruits : Banne nouvelles sources d'honneur.

L'exemple décrire condition de deux hommes. Ène d'entre sa deux la ti éna 2 zardins ki représente ki Bondieu finne accorde li richesse en abondance et progéniture dans deux différent périodes de so la vie. Et sa dimoune la pou protège so di biens et progéniture avec la force militaire (pieds tammes).

Aster, nous essaye comprend la signification de sa l'exemple la. Au début de sa surah la, finne dire ki le Saint Prophète (saw) finne fini passe le message d'Allāh à banne mecquois et ki aster, li pou transmette le message à banne chrétiens aussi. Ti aussi faire référence à zistoire de banne premiers chrétiens (habitants de la cave) ki finne subir persécutions pou zot croyance dans l'unicité de Dieu et ki zot banne successeurs finne vine banne idolatres et zot ti complètement perdi dans la poursuite de banne richesses matériels. L'exemple ici pé dire ki le peuple chrétien pou atteigne grand puissance a deux reprises dans zot zistoire mouvementée. Sa banne zardins ki finne mentionné la. zot ène métaphore et c'est en réalité deux parties d'ène sel zardin et non pas deux zardins. La première période ti précède l'avènement de l'Islam et sa second période la ti commencer à l'aube du 17ème siècle quand banne nations chrétiennes de l'Europe ti commence faire banne grand progrès et zot finne acquérir puissance et prestige ki finne atteindre so sommet au 19ème siècle. Pendant sa interval la, entre sa deux périodes de progrès et prospérité de so banne suivants, le christianisme ti pé ressembler à ène champ de maïs ki ti exposé au danger d'être piétiné et détruit. Dans sa l'interval la, Bondieu finne faire la rivière de l'Islam coulé et fertilise le monde entier. Ène grand homme de vérité – le Saint Prophète (saw) –finne faire so apparition. So venue ti considérer couma plus grand événement dans la vie religieuse

de l'humanité. Li finne amene ène nouveau concept, nouveau idées et nouveau valeurs et finne laisse après li, le Saint Coran couma ène guide infaillible et éternel. Donc, sa expression : « Li ti éna fruits en abondance » signifié ki la nation chrétienne pou continuer faire banne nouveau invention scientifique ki pou ajoute grandement à zot richesse matériels, puissance et prospérité. Banne mots : « Mo pli rice ki toi dans di biens et pli fort grâce à mo clan » veut dire ki la nation chrétienne pou servi zot propre richesse matériels et pouvoir politique et la pauvreté et sous développement de banne musulmans couma argument en faveur de la véracité de zot religion.

### **Verset 36 :**

**« Et Li ti rente dans so zardin alors ki li ti pé faire li-même di tort. Li ti dire : 'Mo pas pensé ki ça, dans aukène moment, pou arrivé détruire !' »**

### **Verset 37 :**

**« Et mo pas pensé li l'Hé-re-là pou vini. Même si rétourne moi vers mo Seignére, certainement mo pou trouve ène meillère l'endroit de rétour ki ça zardin-là. »**

Sa verset la expliquer ki banne nations chrétiennes pou vraiment fière de zot progrès matériels et zot pou sacrifié zot mem pou amène ène la vie aisé, luxieuse et dans zot vanité et l'arrogance zot penser ki zot pouvoir, richesse et prospérité pou durer éternellement. D'après sa verset la, banne chrétiens pou perdi dans ène la vie rempli avec péché et d'iniquité.

Ensuite, sa musulman misère et triste la finne réponne à so camarade chrétien ki ti vantare la. Li finne avertir so camarade pou ki li pas dénier Bondieu dans so vanité. Li finne rode tire li dans so l'état d'auto satisfaction et finne attire so l'attention lor so banne débuts bien insignifi-

ant. En fait, sa zardin la ki ène source de fièreté pou banne chrétiens, finne épanouit après l'islam – zot progrès matériels et puissance actuel. C'est sa puissance irresistible de Gog et Magog ki représente la gloire matériels du christianisme la-mem ki le Saint Prophète (saw) ti pé faire référence quand li ti dire : « personne pas pou éna pouvoir pou combatte ». Zis Bondieu tousel ki pou crée banne circonstances ki pou mène à zot destruction. Banne grand talents et banne acquis intellectuels lor ki zot progrès matériels ti dépanne principalement, pou fini et sa amène à ène désolation complète de zot zardin. Lerla, zot pou plaindre ki zot finne dépense autant travail et l'argent lor banne zafer illusoires de sa la vie la. Sa l'exemple la représente ène prophétie concernant destruction de banne nation chrétiennes.

Ena ène la rivière ki ti pé couler entre sa deux zardins la ki représente la naissance et la montée en pouvoir du prophète de l'islam. Li et so banne suivants finne mette zot l'empreinte dans histoire de l'humanité dans l'intervalle de sa deux périodes la. Quand banne Israelites finne abuse lor possession de sa 'deux zardins' la, et zot finne abandonne banne grand bénédictions divine, et zot finne commence méprise zot cousins, banne Ismaelites, et zot ti tellement dévié spirituellement ki zot ti pé penser ki sa banne bénédictions divine la pas ti banne faveurs divine mais ki zot ti mérite sa par zot propre zéfforts. Ensuite Bondieu finne tend banne supplications de banne Ismaelites méprisés et opprimés et Li finne détruire banne zardins ki ti appartenir à la dispensation mosaïque, c'est à dire, Bondieu finne enlève pouvoir de banne juifs et banne chrétiens et finne choisir banne Ismaelites, ki ti être méprisés et finne donne zot banne zardins meilleur ki sa banne zardins ki ti donne à banne juifs et banne chrétiens. Surah Bani Israil contenir ène récit de banne faveurs ki finne accorder à banne juifs. Surah Al Kahf traite banne progrès matériels et l'avancement de banne nations chrétiennes.

## *Isra de Moïse (as)*

Maintenant, pou ki capave donne ène cadre historique à l'ensemble de sa récit la et pou connecté li à tout, finne donne ène description détaillé de Isra de Moïse (as) dans sa surah la. Dans Bani Israil, finne décrire sa voyage spirituel de Moïse (as) la dans ène langage métaphorique et sa grand progrès matériel et morale ki so banne suivants ti pou faire la. Isra de Moïse (as) décrire en détail quand et couma sa grand avancement la pou commencer et kotsa li pou arrêter et quand eski banne Israelites pou privés de banne faveurs divine, ki en retour pou transmette à banne Ismaelites. Moïse (as) ti prophétise l'avènement d'ène prophète ki pou couma li. Quand mette banne récit de Moïse (as) so voyage spirituelle entre celui de banne habitants de la cave et celui de Dhul Qarnain (sa 2 périodes la représente l'avancement et progrès de banne chrétiens), le Saint Coran finne souligne le fait ki sa prophète ki Moïse (as) ti prophétiser la, ki ti pou pareil couma li, sa prophète la ti supposer vini pendant l'interval de sa 2 périodes la. Alors, sa banne incidents la finne mentionné dans zot l'ordre historique.

Au début de sa surah la, fine attire l'attention lor banne grands résultat ki pou vini après Hijrat du Saint Prophète (saw) à Madina et banne succès merveilleux ki banne musulmans pou gagner après sa. Finne aussi averti zot concernant banne grands dangers ki zot capave rencontrer en chemin et l'opposition incéssante de banne juifs et banne chrétiens particulièrement banne moments difficile ki l'islam en tant ki force politique pou faire face de la part de banne juifs et banne chrétiens. Finne mentionne Isra de Moïse (as) seulement pou support banne prophéties ultime de l'islam ki le Isra du Saint Prophète (saw) finne mette en avant et aussi ki sans auken doute, la puissance et prospérité éblouissantes de banne nations chrétiennes la pou duré pou ène lè-temps limité et la cause de l'islam pou éventuellement triompher.

**La vision de Moïse (as) finne mentionné dans sa surah la pou**

## **souligne banne faits suivants :**

(1) Ki finne décrété ki normalement le Saint Prophète (saw) bizin vini après ki banne chrétiens, ki constituer la deuxième partie de la dispensation mosaïque, finne vine corrompus.

(2) Ki à cause l'enseignement islamique basé lor banne la lois et principes ki fondamentalement différent de certains la loi mosaïque, li ti impossible pou éna ène vrai coopération entre banne juifs et banne musulmans, mais, pou gagne le salut sans adhère à banne principes islamique aussi ti impensable.

(3) Ki banne juifs et banne chrétiens pou refuse accepter le Saint Prophète (saw) et zot pou suivre zot propre chemin et ki à long terme, zot pou bizin prête allégeance à li.

(4) Ki après 1 long voyage fatigant et après ki zot finne désespérer pou gagne vrai la paix et contentement d'esprit grace à zot propres zéfforts et sans auken aide, banne juifs et banne chrétiens pou obliger faire le point lor zot position et zot pou réaliser ki le fait ki zot religion finne dépasse so utilité, zot ti bizin abandonne zot religion dépi bien longtemps.

(5) Ensuite, après ki zot finne réalise sa, banne prophéties ki concerne zot et ki préservé dans le Saint Coran, pou faire banne juifs et banne chrétiens accepter le Saint Prophète (saw).

(6) Ki après ki zot finne accepter l'Islam, zot pou soumettre zot à banne limitations et restrictions ki finne imposé à l'homme pou réglé zot conduite morale et quand zot pou soumettre zot banne passions, zot pou attirer la Grâce de Dieu et zot pou baigner dans la mer de Sa miséricorde. En effet, Isra de Moïse (as) finne servi couma ène zoli introduction de la future dispensation islamique ki ti pou remplacer la loi mosaïque.

# *Dhu'l Qarnain*

Après le récit précédant concernant Isra de Moïse (as), finne rapporter ki après ki banne Ismaelites finne vine héritiers de banne faveurs de Dieu, à zot tour, zot pou attirer la colère d'Allāh en défiant So banne commandements et zot pou gagner punition de la part de banne chrétiens. Banne suivants corrompu du Saint Prophète (saw) pou être punis par Gog et Magog, ki, ène sel coup, pou propagé et domine le monde entier. Ensuite, Dhu'l Qarnain finne appaite et finne déboute couma ène obstacle à la domination de Gog et Magog dans le monde entier. Donc, banne habitants de la cave représente banne premiers chrétiens durant zot période de faiblesse et Gog et Magog représente banne chrétiens quand zot gloire ti au sommet dans nous l'époque. Gog et Magog zot chrétiens seulement par nom, parski en vrai, zot tout à fait étranger à vrai l'esprit de zot religion. La deuxième période (couma finne expliquer dans l'exemple des deux jardins) ki représenté dans banne écritures divine par l'ascension phénoménale en puissance de Gog et Magog et par Dhu'l Qarnain ki ène de banne thèmes principales de sa surah la.

En bref, Gog et Magog c'est le nom ki finne donner à banne tribus ki vive dans le Nord-Ouest de l'Asie et dans l'Est de l'Europe. Gog et Magog finne met lizié lor banne terrains fertile de l'Asie et zot éna ène désire intense pou conquérir sa banne terrains la. Mais, Dhu'l Qarnain finne mette ène barrière formidable ki finne empêche zot propagé dans l'Asie et finne oblige zot pou bouger vers l'Ouest. Zot finne propager dans différents parties de l'Europe et finne rentrer en contact avec le christianisme, ki zot finne accepter et finne faire li vine zot religion nationale.

## **Ki sanla Dhu'l Qarnain ti été?**

**Le Saint Coran finne mentionne 4 signes distinctifs de Dhu'l Qarnain :**

(1) Li ti ène servitère juste de Dieu.

(2) Li ti ène grand conquérant et ène souverain bon et juste ; et li ti pé traite banne pays ki li ti conquerir avec beaucoup de bienveillance.

(3) Line marche vers l'Ouest et finne faire banne grands conquêtes jusqu'a ki li finne arrive à ène l'endroit cot li finne trouve soleil pé couché dans ène la mare de l'eau et li finne tourne vers l'Est et finne conquérir et soumette banne térritoires vastes.

(4) Et enfin, li finne alle dans ène région intermédiaire cot ène peuple sauvage ti pé rester et cot Gog et Magog finne faire banne incursions et li finne construire ène miraille pou arrête sa banne incursions la.

Aster, parmi banne grand monarques et banne capitaine militaire célèbres des anciens temps, Cyrus ti possède dans ène grande mesure sa 4 qualités ki finne mentionné la haut la.

Alors, li ti mérite plus ki zot tous pou être considéré couma Dhu'l Qarnain du Saint Coran. Cyrus ti ène servitère juste de Dieu et li ti béni avec révélation divine. Li ti ène suivant de Zoroastre et de tous banne lézot religions. Après l'Islam, c'est le zoroastrianisme ki mette plus l'emphase lor la vie après la mort. Li ti ène grand conquérant et ène dirigeant très humain ki ti pé traite généreusement banne nations ki li ti conquérir et en retour, li finne recevoir zot allégeance de maniere volontaire. Cyrus ti conquérir Babylone, Ninive et banne colonies grèques ki ti alle jusqu'au nord de l'Asie Mineure jusqu'a la mer Marmara. Apres so banne conquêtes, Cyrus finne tourne so l'attention vers ène région intermédiaire. Li ti pé habite parmi ène peuple sauvage ki ti la cible

constant de banne attaques de Gog et Magog et li finne monte ène miraille pou arrête sa banne attaques la – le célèbre mur de Derbent ou Derbend.

L'histoire de Dhu'l Qarnain pou reste incomplet à moins ki donne la raison kifer finne donne li ène place aussi important dans le Saint Coran. C'est ène fait historique et pas paret ki li concerne nous directement ou profite nous spirituellement ou matériellement. Au fait, li plus à cause de so l'importance spirituel ki historique ki Dhu'l Qarnain finne gagne ène grand partie dans le Saint Coran.

**Le Saint Coran, c'est pas ène livre d'histoire. Li contenir beaucoup prophéties concernant banne évènements futurs. Certains de sa banne prophéties la finne fini accompli en la personne du Saint Prophète (saw) et lézot pou réaliser dans le futur.**

Le récit de Dhu'l Qarnain, pareil couma banne récits similaire du Saint Coran, incarne ène grand prophétie ki finne accompli en la personne de Ahmad, le saint fondateur du Mouvement Ahmadiyya. Ahmad (as) ti le Dhu'l Qarnain de nous l'époque. Mais le récit coranique concernant Dhu'l Qarnain historiquement applique pou le grand monarque persan, Cyrus, et applique pou Ahmad (as) spirituellement. Sa prophétie la, li important dans le sens ki pareil couma au 6ème siècle avant JésusChrist, Cyrus ti sauve la Perse de banne attaques hostiles de Gog et Magog quand li ti monte ène miraille en brique et en pierres, ène lot Dhu'l Qarnain pou sauve l'âme et l'esprit moral de l'humanité de banne assauts dévastateur de banne nations chrétiennes de l'Ouest, ki banne descendants de Gog et Magog. Le Prophète Ahmad (as) ti possède plusieurs ressemblances physiques et spirituels avec le grand Cyrus. Pareil couma Cyrus, ti pé appel li le Messie et pareil couma li, Ahmad (as) ti d'origine perse. Le travail ti confié à sa deux Dhu'l Qarnain la, ti éna ène ressemblance frappante.

Dans banne derniers versets de Surah Al Kahf, finne encore ène fois mentionne banne dimoune ki finne prend Jésus (as) couma zot sauveur et couma le fils de Dieu - c'est à dire, banne nations chrétiennes de l'Ouest. C'est banne dimounes ki rode banne confort matériels et banne avantages mondains et Bondieu péna auken place dans zot leker. Allāh dire ki banne dimounes ki tourne zot lédos avec Li, zot pas pou gagne auken récompense dans la vie lot le monde la, zot pou brilé dans difé l'enfer.

Quand banne nations chrétiennes pou commence décliné, banne musulmans pou commence avancer et progresser et pou jette ène nouveau et meilleur fondation d'ène ordre mondiale lor la cendre de zot gloire. Enfin, banne croyants pou récompensé pou zot sacrifices et zot souffrances mais zot banne sacrifices dans chemin d'Allāh, pas pou éna fin. Après ki zot finne faire face au déclin et la chute de banne nations chrétiennes, et la montée de l'Islam, sa surah la décrire banne conditions ki pou suivre le triomphe de l'Islam. Finne dire nous ki banne musulmans aussi pou tourne zot lédos avec la religion et zot pou entièrement absorbé dans la poursuite de banne richesses matérielles et pouvoir. Pou punir zot pou zot péchés, Bondieu, pou encore ène fois , faire banne nations chrétiennes gagne succès et prospérité. Ensuite le monde pou conne la grande destruction et tous banne pays pou divisé entre deux camps hostiles, avec deux idéologies opposés. Seulement banne vrai suivants du Saint Prophète (saw) ki pou jouer ène role important dans arrête le déferlement de sa déluge la ki pé menace pou engloutir le monde.

Finne rapporté ki le Saint Prophète (saw) finne dire ki récitation de banne derniers versets de Surah Al Kahf protège nous contre banne assauts spirituels du Dajjal. Sa montré nous ki Dajjal et Gog et Magog zot ène sel et banne mem dimounes. Banne nations chrétiennes de l'Ouest ; le Dajjal représente l'aspect maléfique de zot propagande religieuse et Gog et Magog représente zot prédominance matériels et politique.

Pour tous commentaires ek suggestions,  
contacter nous par mail à l'adresse  
**[ishaatlajnamu@gmail.com](mailto:ishaatlajnamu@gmail.com)**



Lajna Ima'illah  
Ile Maurice  
2021-2022